

Kadamb ka Ped

Poetess: Subhadra Kumari Chauhan

yeh kadamb ka ped agar maa hota yamuna teerey,
main bhi us par baith kanhaiyya banta dheerey-dheerey.

le deti yadi mujhe bansuri tum do paisey wali,
kisi tarah neechey ho jati yeh kadamb kee dali.

tumhey nahi kuchh kehta par main chupke chupke aata
us neechey dali se amma unchey par chhad jata.

wahin baith fir badey mazey se mein bansuri bajata,
amma amma keh bansi ke swar mein tumhey bulata.

sun meri bansi ko maa tum itni kush ho jati,
mujhey dekhney ko tum bahar kaam chhod kar aati.

tumko aati dekh bansuri rakh mein chup ho jata,
patton mein chhip kar fir dheerey se bansuri bajata.

bahut bulaney par bhi maa jab nahi utar kar aata,
maa, tab maa ka hridya tumhara bahut vikal ho jata.

tum aanchal phela kar amma wahin ped ke neechey,
ishwar se kuch binti karti baithee aankhey meechey.

tumhey dhyaan mein lagi dekh mein dheerey dheerey aata,
aur tumharey phailey aanchal ke neechey chhip jata.

tum ghabra kar aankh kholti par maa khush ho jati,
jab apney munney raja ko godi mein hee pati.

isi tarah kuch khela karte, hum tum dheere dheere,
“maa” kadamb ka ped agar, ye hota yamuna teere.